



Ein cyf/Our ref DB-PO-0085-24

Delyth Jewell AS  
Cadeirydd  
Pwyllgor Diwylliant, Cyfathrebu, y Gymraeg, Chwaraeon, a Chysylltiadau Rhyngwladol

12 Mawrth 2024

Annwyl Delyth,

### **Craffu ar Ddarlledu Gwasanaeth Cyhoeddus**

Diolch am eich llythyr dyddiedig 15 Rhagfyr 2023 yn gofyn am wybodaeth yn dilyn gwaith craffu'r Pwyllgor Diwylliant, Cyfathrebu, y Gymraeg, Chwaraeon a Chysylltiadau Rhyngwladol ar Ddarlledu Gwasanaeth Cyhoeddus yng Nghymru.

Nodir yr ymatebion i'r cwestiynau a godwyd gennych yn eich llythyr isod.

*Pryd y bydd Llywodraeth Cymru yn cyhoeddi penderfyniad am sefydlu Awdurdod Darlledu Cysgodol? Os na fydd Llywodraeth Cymru yn sefydlu Awdurdod Darlledu Cysgodol, a fydd yn ailddyrannu dyraniadau penodol y gyllideb a fwriedir at y diben hwnnw yn uniongyrchol i bolisiau eraill i wella'r ddarpariaeth o gyfryngau i Gymru?*

Cyhoeddwyd ymateb Llywodraeth Cymru i argymhelliad y panel arbenigol ar ddarlledu i sefydlu Awdurdod Darlledu Cysgodol heddiw mewn [Datganiad Ysgrifenedig](#).

Bydd y cyllidebau a neilltuwyd ar gyfer darlledu a'r cyfryngau drwy'r Cytundeb Cydweithio yn parhau i gael eu defnyddio i gefnogi'r ymrwymadau hynny ac i weithredu yn unol ag ymateb Llywodraeth Cymru i adroddiad y panel arbenigol ar ddarlledu.

*Beth yw barn Llywodraeth Cymru am ddigonolrwydd y ddarpariaeth cyfryngau darlledu i Gymru?*

Mae Cytundeb Cydweithio Llywodraeth Cymru gyda Phlaid Cymru yn nodi ein barn bod y fframwaith darlledu a chyfathrebu presennol yn annigonol, yn rhwystro bywyd democrataidd ein gwlad ac nad yw'n diwallu anghenion y Gymraeg, nac uchelgeisiau ar gyfer y Gymraeg. Mae'n tynnu sylw at yr angen i wella newyddiaduraeth Cymru ac i fynd i'r afael â'r diffyg gwybodaeth. Cyfryngau amlddarparwr yw asgwrn cefn unrhyw gymdeithas ddemocrataidd, weithredol ac mae diogelu'r gymdeithas honno yn hollbwysig i sicrhau darpariaeth newyddion ddeallus a chytbwys. Rydym yn dibynnu'n fawr ar newyddion a ddarlledir yng Nghymru, ac mae tystiolaeth yn awgrymu bod angen i ni wneud mwy i sicrhau dewis o newyddion a chywirdeb yn y ddarpariaeth ar lefel y DU . Er enghraifft, mae adroddiad

Canolfan Cyswllt Cyntaf / First Point of Contact Centre:  
0300 0604400

Bae Caerdydd • Cardiff Bay  
Caerdydd • Cardiff  
CF99 1NS

[Gohebiaeth.Dawn.Bowden@llyw.cymru](mailto:Gohebiaeth.Dawn.Bowden@llyw.cymru)  
[Correspondence.Dawn.Bowden@gov.wales](mailto:Correspondence.Dawn.Bowden@gov.wales)

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Prifysgol Caerdydd 2022 'Adrodd ar y gwledydd a materion datganoledig ar newyddion rhwydwaith: Dadansoddiad o ddarpariaeth teledu ac ar-lein, yn nodi, er bod darparwyr newyddion y DU wedi gwella'r sylw maent yn ei roi i faterion yn ymwneud â'r gwledydd datganoledig, roedd hyn yn bennaf oherwydd rheolau adrodd oedd yn ymwneud â'r pandemig. Fel y gwelwyd yn ystod yr argyfwng, codwyd pryderon o ran y diffyg gwahaniaeth rhwng y rheolau a osodwyd ar Lywodraeth y DU a'r Llywodraethau yng Nghaerdydd, Caeredin a Belfast. Amlygodd adroddiad y panel arbenigol ar ddarlledu fod cynulleidfaoedd di-Gymraeg o Gymru yn parhau i gael eu tan-wasanaethu gan gynnwys penodol i Gymru.

Er hyn, mae datblygiadau cadarnhaol i'w gweld yn y sector darlledu yng Nghymru. Mae ffocws Cymru Greadigol ar gynnal twf a sicrhau bod Cymru yn lleoliad poblogaidd ar gyfer cynhyrchu ar gyfer ffilm a theledu wedi denu cynrychiadau mawr yn ystod y blynyddoedd diwethaf, gan gynnwys *Havoc* Netflix a chynhyrchiad Lucasfilm o *Willow*. Mae cysylltiad cadarnhaol gyda'n darlledwyr gwasanaethau cyhoeddus, gan gynnwys drwy ein Memorandwm Cyd-ddealltwriaeth, wedi gweld BBC Cymru Wales yn galw 2023 yn flwyddyn y ddrama Gymraeg. Mae hyn wedi cefnogi cynnwys sy'n adlewyrchu ein bywyd a'n diwylliant Cymreig i gynulleidfaoedd yng Nghymru a'r rhai yng ngwledydd eraill y DU, gan arddangos ein doniau a'n tirweddau. Mae trefniadau partneriaeth gydag S4C a Ffilm Cymru yn cefnogi mwy o fuddsoddiad i sector ffilm Cymru.

Ein nod yw adeiladu ar ddatblygiadau cadarnhaol, tynnu sylw at broblemau a bylchau parhaus yn y ddarpariaeth, a thargeddu gweithgarwch yn y dyfodol yn unol â hynny, gan weithio gyda'r Corff Cynghori newydd ar Ddarlledu a Chyfathrebu a'r Gweithgor Newyddiaduraeth er Budd y Cyhoedd Cymru.

*Pa newidiadau polisi allweddol, os o gwbl, yr hoffai Llywodraeth Cymru eu gweld yn cael eu gwneud naill ai ar lefel Cymru neu'r DU i wella'r ddarpariaeth cyfryngau darlledu i Gymru?*

Hoffai Llywodraeth Cymru weld newidiadau a fyddai'n sicrhau llais digonol i Gymru mewn penderfyniadau sy'n ymwneud â darlledu sy'n effeithio ar Gymru, a strwythurau gwell yn cael eu rhoi ar waith i gynyddu tryloywder a gwella atebolrwydd i Gymru. Er enghraifft, rôl gydsynio gryfach, fwy ffurfiol ym mhob penodiad darlledu sy'n effeithio ar Gymru, rôl ffurfiol mewn adolygiadau a'r broses gwneud penderfyniadau ar gyllid i ddarlledwyr sy'n effeithio ar Gymru, megis Adolygiad Trwyddedau Teledu, a gwell trefniadau llywodraethu i ddarlledwyr, er enghraifft drwy Siarter BBC i Gymru. Ar ôl ei sefydlu, bydd gan y Corff Cynghori ar Ddarlledu a Chyfathrebu rôl bwysig i ddarparu arweiniad a chynghor i lywio polisi Llywodraeth Cymru a nodi camau penodol i helpu i wella'r ddarpariaeth o gyfryngau darlledu i Gymru.

*Beth yw barn Llywodraeth Cymru am ddatganoli darlledu?*

Barn Llywodraeth Cymru, fel y nodir yn y Cytundeb Cydweithio, yw y dylid datganoli pwerau darlledu a chyfathrebu i Gymru.

Yn gywir,



**Dawn Bowden AS/MS**  
**Dirprwy Weinidog y Celfyddydau, Chwaraeon a Thwristiaeth**  
**Deputy Minister for Arts, Sport and Tourism**